



UNIVERSITÄTS-
BIBLIOTHEK
PADERBORN

**Les Fleurs Des Vies Des Saints Et Des Festes De Toute
L'Annee, Suivant L'Usage Du Calendrier Romain Reforme**

Augmentees des Saints & Bien-heureux Peres Iesuites, de Saint Charles
Borromeo, & de Sainte Françoise ; Avec le Martyrologe Romain, pour
tous les iours de l'Annee ...

Ribadeneyra, Pedro de


Paris, 1631

XVI La vie de saint Toribie, Confesseur.

[urn:nbn:de:hbz:466:1-75749](https://nbn-resolving.org/urn:nbn:de:hbz:466:1-75749)

16. d'Espagne disent l'Office de saint Fructueux, Brage, Euore, Compostele, Dumie & autres. Sa vie se trouue escrete bien au long dans les anciennes Legendes des saints. Le Martyrologe Romain fait mention de luy le 16. Aueil, & le Breuiare, & le dixiesme Concile de Toled. L'Eglise de Segouie a vn autre Fructueux pour patrõ, qu'elle solemnise le 27. Octobre, ainsi que dit le Cardinal Baronius es Annotations du Martyrologe.

LA VIE DE SAINT TORIBIE,
Euesque & Confesseur.

 Aint Toribie Euesque d'Astorque estoit Espagnol, à ce que dit Iean Molá, es additions qu'il a faites au Martyrologe d'Vsuard, natif de Palence, homme saint & docte, tres-zelé de la foy Catholique. L'on tient assurement qu'il alla à Rome, & fit cognoissance avec le Pape S. Leon le Grand, qui remplissoit lors le siege de saint Pierre, & qu'il passa iusques en Hierusalem, pour voir ces saints lieux par deuotion. Il retourna en Espagne, & la trouua fort gastée & infectée de l'heresie de Priscilien, qu'un meschant homme nommé Marc, Egyptien de nation, y auoit quelque temps auparauant apportée, & Priscilian, qui estoit riche Gentil-homme, eloquent, lettré, efficace & vehement, ayant aualé ce venin, l'alloit vomissant par les prouinces, si bien que de laïque & heretique qu'il estoit, il fut fait Euesque par les faueurs & mauuais artifices de ceux de sa secte, & eut assez d'autorité & de malice pour troubler la paix de l'Eglise. Et combien que Priscilian eust esté condamné à mort par l'Empereur Maxime, & l'Arrest executé en sa personne, & que quelques Papes & Docteurs de l'Eglise, mesme les Empereurs eussent fulminé par leurs loix contre les Priscilianistes, neantmoins sa zizanie estoit tellement enracinée & suivie de tant de monde, qu'il eut assez d'affaires à l'extirper & bannir de l'Espagne. A quoy Toribie seruit beaucoup par son grand zele, vigilance & industrie. Car premierement il commença à prescher contre ceste heresie, avec vne ferueur accompagnée d'une science rare: nostre Seigneur le fauorisoit, & confirmoit sa doctrine par des miracles, à la confusion des heretiques. Car preschant vne fois à Palence contre les Priscilianistes, qui mesprisoient & faisoient des oppobres de la parole de Dieu: il monta sur la plus haute colline de la ville, où est à present l'Hermitage de S. Christophle, & de là il demanda à Dieu, les larmes aux yeux, vn chastiment du Ciel cõtre ces malicieux heretiques. Soudain le ruisseau Carion se déborda, & renuerça vne grande partie de la ville. Le saint ne se contentoit pas de prescher & escrire contre ceste heresie, mais ayant visité plusieurs Eglises d'Espagne, & recogneu de ses yeux la perdition des ames, qui procedoit de ceste pestilencieuse heresie, il escriuit à certains Euesques, en toute hu-

16. milité, mais de bon ancre, les resucillant & encourageant à remedier à vne chose de telle importance, & si pernicieuse à l'Eglise de Dieu. Et voyant qu'il n'aduancoit en rien, il eut recours au Pape S. Leon; comme au Iuge & Pasteur souuerain, & luy enuoya par vn de ses Diactres, ce qu'il auoit écrit contre l'heresie de Priscilian, le suppliant (comme Vicair de Iesus-Chr. en terre) d'estindre ce grand feu. Le Pape Leon embrassa tres-volontiers la proposition de Toribie, & le loia hautement en vne longue Epistre, qui est la 99. des siennes, en laquelle il destruit article par article, les erreurs de Priscilian, qui estoient en grand nombre, & fort extrauagans, & manda à Toribie qu'il sollicité les Euesques de diuerses prouinces, d'assembler vn Synode, pour condamner les erreurs de Priscilian, monstrant en cela cõbien il estimoit la sainteté, zele, doctrine, & obeyssance de Toribie. Le Synode fut congregé en vn bourg de Galice, nommé Cenés, auquel Priscilian, & son heresie, furent condamnez, & l'on redigea par escrit vn formulaire de la vraye foy Catholique, lequel renuoyé à Balconie, Prelat, qui estoit superieur des Eglises de Brages, de ce Royaume, obeyssans tous, comme il estoit bien raisonnable, au Pontife Romain. Entr'autres choses, que met S. Toribie en ceste lettre qu'il escriuit aux Euesques, qui auoient fomenté les erreurs de Priscilian, il exaggera fort le preiudice que font les liures apocryphes, que les heretiques publioient pour diuins, & les exhorte fort de les censurer, comme chose tres-preiudiciable & dommageable. C'est chose certaine, qu'entre les soins que doiuent auoir les Gouverneurs des Republiques, principalement les Pasteurs Ecclesiastiques, qui ont le plus notable interest, c'est de proposer abondamment des liures Catholiques, doctes, graues, & utiles: & defendre non seulement ceux qui viennent de la boutique des heretiques, faux & reprouuez; mais aussi des liures lascifs, legers, & inutiles, qui ne seruent qu'à entretenir le monde, & leur desrober le temps, sans aucun profit.

17. Retournant donc à saint Toribie, tandis qu'il s'employoit à combattre les heretiques par sa vie, par sa doctrine, & par ses escrits, à confirmer les Catholiques en la vraye Foy, à reformer leurs mœurs, & à s'exercer es bonnes ceuures, il acheua heureusement sa vie, & alla iouir de Dieu, nostre Seigneur ayant fait plusieurs miracles par son intercession. Il deceda le iour qu'on celebre sa feste, à sçauoir le 16. Aueil. Quelques Eglises d'Espagne font commemoration de luy, comme celles de Burgos, Palence, Segouie, Siguença, Astorque & autres. Il fut enterré en l'Eglise saint Martin es montagnes de Lieuane, enuiron l'an de nostre Seigneur 460. On monstre son tombeau où est son corps saint, avec plusieurs autres Reliques, qui sont visitées par les pelerins qui vont là en voyage, & on tient par vne tradition certaine que S. Toribie apporta la pluspart de ces Reliques de Hierusalem, & que le surplus luy fut donné par le saint Pape Leon. Les Breuiaries anciens d'Espagne escriuent de saint Toribie, & le Martyrologe Romain le 16. Aueil, & le Cardinal Baronius

en ses Annotations, & plus au long dans le sixiesme Tome deses Annales.

les autres qui font mention des Papes, ont escrit d'Anicet.

17.
AVR.

A Coranthe decederent les Saints martyrs Calliste, Charité, & autres sept, lesquels furent jettez dans la mer. A Sarragosse ville d'Espagne dix-huit martyrs, Optat, Lupercus, Successe, Martialis, Urban, Inles, Quincilian, Publie, Fronton, Felix, Cerialian, Euenice, Primus, Apodeme, & autres quatre, qui auoient le mesme nom, scauoir est Saturnin. Tous lesquels furent tourmentez & martyrissez sous Dacian Gouverneur d'Espagne. Prudence Poeta a fait un bel Hymne en leur louange. Item saint Caie & Cremence, lesquels ayant deux fois confessé nostre Sauueur, gaignerent le prix du martyre. A Palence ville du Royaume d'Arragon en Espagne, trespassa S. Theobald Euesque d'Astorge, lequel à la faueur du Pape Leon, extermina du tout l'heresie des Priscillians, laquelle regnoit en ce quartier la, & ayant fait plusieurs miracles reposa en paix. A mesme iour mourut S. Paterne Euesque d'Amanches en Normandie. A Valencien en Flandres saint Dragon Confesseur, qui a fait plusieurs miracles.

LA VIE DE SAINT ANICET, Pape, & Martyr.

AR la mort du saint Pape Pie I. du nom, & martyr, saint Anicet luy succeda. Il estoit Syrien de nation, fils de Iean de Bice-Humisa, lequel fut pape onze ans quatre mois & trois iours, selon platine en sa vie, & selon

le Cardinal Baronius, neuf ans moins trois mois & sept iours, sous l'Empire de Marc Antonin Verus, & de Luce Aurele Commode son frere. Anicet fut vn tres-saint pape, qui merita la couronne du martyre, mourant pour Iesus-Christ, il fut enterré dans le cimetièrre de Calixte le dix-septiesme d'Auril, auquel la sainte Eglise celebre sa feste. Il mourut l'an de nostre Seigneur cent soixante-cinq, selon Baronius. Il tint cinq fois les Ordres au mois de Decembre, & y fit dixsept prestres, quatre Diacres, & neuf Euesques. Du temps de ce saint pape, S. Policarpe vint à Rome, qui estoit Euesque de Smyrne, disciple de Saint Iean l'Euangeliste, & comme Pere & gouverneur de toutes les Eglises d'Asie, pour conferer avec luy du temps auquel les Chrestiens deuoient celebrer la feste de Pasques, de peur de se rencontrer avec les Iuifs comme nous auons dit en la vie de saint Policarpe. Egesippe vint aussi à Rome: c'est vn ancien Historien, qui viuoit immediatemēt apres les Apostres, lequel a escrit l'histoire Ecclesiastique, d'vn stile plein & fluide, depuis la Passion de nostre Seigneur, iusques à son temps. Nous trouuons vne Epistre Decretale de saint Anicet aux Euesques de France, en laquelle il comāde plusieurs choses saintes aux Euesques, archeuesques, Metropolitains & Primats, & ce qu'ils doiuent faire par entr'eux: finalement il ordonne que les Clercs ne porteront point les cheueux longs, & qu'ils se conformeront à la doctrine de l'apostre saint Paul. Car tout ainsi que le Clerc doit estre distingué en la vertu & conuerfation d'avec le seculier lay: de mesme il le doit estre en son habit, & en sa cheuelure. Saint Damase, Platine, &

A Rome deceda saint Anicet Pape & martyr, successeur de Pie, lequel ayant long-temps combattu contre les heretiques, receut la couronne du martyre durant la persecution de M. Aurele Antonin, & Luce Vere. En Affrique saint Mappalique martyr, lequel comme escrit saint Cyprian, fut martyrisé avec plusieurs autres. Là mesme les Saints Fortunat & Marciā. En Antioche saint Pierre Diacre, & Hermogenes son seruiteur, martyrs. A Cordouë en Espagne, moururent les Saints martyrs Elie Prestre, Paul & Isidore Moines. A Vienne S. Pantagathe Euesque. A Tortone ville de Lombardie, saint Innocent Euesque & Confesseur. A Cistaux saint Estienne Abbé, qui demoura le premier en celieu desert, & recent ioyeusement saint Bernard & ses compagnons venans à luy, par le moyen desquels il dressa plusieurs Monasteres.

A Rome se fait la feste de S. Apollone Senateur, lequel sous l'Empereur Commode, & le gouverneur Perenic, ayant esté traistrement descouuert & accusé comme Chrestien, par vn sien seruiteur, receut commandement de rendre compte de sa foy, & à ces fins composa vn beau liure qu'il leur en pleine assemblee du Senat, & neantmoins fut sans autre forme de procez, condamné à auoir la teste tranchée. A Mesme deceda saint Eleuthere Euesque de Selanonie, lequel estant homme de grande sainteté, & renommé par ses miracles, endura du temps de l'Empereur Adrian, vn lit de fer rouge de feu, la grille poëlle à frirre pleine d'huile, & poix-resine bouillante, la fut exposé aux lions, sans recevoir aucun dommage de tous ces tourmens, & en fin fut estranglé avec sa mere Euanthie, Au mesme lieu saint Corebe gouverneur, ayant esté conuerty à la Foy par le susdit Eleuthere, eut la teste tranchée. A Sarragosse en Espagne, sainte Eucrarie vierge & martyre, apres auoir enduré diuers tourmens, & perdu l'vne de ses mammelles qu'on luy couppa, fut deteniē en prison, iusques à ce que par le moyen de ses playes tout son corps fust pourry. A Cordouë mourut saint Prefet Prestre, massacré par les Mores, parce qu'il preschoit contre la secte de Mahomet. A Milan saint Galdin Euesque, ayant finy son Sermon contre les Cathares heretiques rendre l'esprit à Dieu. A Bins en Haynant, deceda saint Vrsmer Euesque & Confesseur.

A Coranto deceda saint Timon l'un des sept premiers Diacres, lequel resida quelque temps à Berce, en seignant le peuple de la ville, & puis preschant l'Euangile; fut à Coranto, ou les Grecs & Iuifs le ietterent dedans le feu, duquel il ne receut aucun dommage, puis le crucifierent. A Melitine ville d'Armenie, les saints Hermogenes, Caie, Expedite, Aristonius, Ruse, Galata, qui furent couronnez du martyre en vn mesme iour. A Perge ville de Pamphlie trespasserent saint Theodore & Philippe sa mere: S. Theodore fut crucifié, & vescut trois iours sur la Croix: sa mere fut decolée. A mesme iour moururent saint Socrates, & Denys, qui furent tuez à coups de lances. En Hierusalem saint Paphnuce martyr. En Antioche ville de Pisidie, saint George Euesque, lequel mourut en exil pour l'honneur deu aux Images. A Cantorbie en Angleterre saint Ephege, Euesque & martyr, qui de son viuant & apres sa mort a fait plusieurs miracles. A Rome saint Leon Pape LX. du nom, lequel succeda à Damase II. & fut renommé pour sa sainteté & miracles.

A Rome se fait la feste des Saints Sulpice & Seruilian, lesquels ayans esté conuertis par les remonstrances & miracles de sainte Domitille vierge, & refusant de sacrifier aux idoles, eurent la teste tranchée par sentence d'Anian Gouverneur de ladite ville. A mesme iour endurerent les SS. martyrs, Victor, Zorique, Zenon, Acindine, Cesarie, Seuerian, Chrysophore, & Antonin sous l'Empereur Diocletian. A Tomes en Scythie saint Theotime Euesque, remeré par les Payens mesme pour sa sainteté & miracles. A Ambrun en Prouence deceda saint Marcellin premier Euesque dudit lieu, lequel estant enuoyé de la part de Dieu, vint des quartiers d'Affrique avec ses compagnons Vincent & Domin, & par ses predications &

18.
AVR.

19.
AVR.

20.
AVR.